

Badische Landesbibliothek Karlsruhe

Digitale Sammlung der Badischen Landesbibliothek Karlsruhe

Historia Zaringo Badensis

Schöpflin, Johann Daniel

Carolsruhae, 1765

XIV.

[urn:nbn:de:bsz:31-295118](https://nbn-resolving.org/urn:nbn:de:bsz:31-295118)

XIV.

CHARTA CONCAMBII, QUA BURCARDUS BASIL.
EPISCOPUS LOCUM *CELLA* IN NIGRA SILVA CON-
CEDIT S. ULRICO.

A N N O M L X X X V I L

Ex Tabular. Abbatie Cluniacensis.

In nomine sancte & individue Trinitatis. Noverit omnium fidelium tam futurorum quam præsentium vniversitas qualiter venerabilis pater Dominus Vdalricus monachus Cluniacensis & prior de *Gruningun* precibus suis impetraverit a Basiliense Episcopo Domino Burcardo, ut locus ille, qui *Cella* dicitur, qui situs est in nigra silva, in *pago Brisgowe*, in conitatu *HERIMANNI Comitis*, per legitimum concambium ad Cluniacum traderetur, quod concambium ut fieret per advocatum nostrum Erlewinum, & Seligerum militem ejusdem Ecclesie advocatum, idem Episcopus benigne indulfit, conlaudavit, ac precepto suo confirmavit. dedit igitur idem advocatus noster Erlewinus super sacrosanctas Reliquias Basiliensis Ecclesie predium, quod habuimus in villa, que *Bigingen* vocatur, pro commutatione celle, quam prediximus. Sed quia quibusdam hoc minus sufficere videbatur, advocatus noster, Dominus scilicet Erlewinus, donavit nobis in loco, qui dicitur *Antparingen* mansum unum; quem ita partiendo expendimus, ut media pars ejusdem ad supplementum concambii adderetur, altera vero, quia locus

Celle in parochia Ecclesie, que vocatur *Kirichoven*, situs erat pro redimendis ejusdem loci decimis deputaretur. his ita peractis, advocatus Episcopi Seligerus dedit super sacrosanctas Reliquias Cluniacensis Ecclesie locum prenominate Celle in propriam & perpetuam potestatem cum omnibus appenditiis & justitiis suis, videlicet agris, pratis, pascuis, terris cultis & incultis, silvis, molis, molendinis, aquis aquarumve decursibus, exitibus & reditibus, cunctisque locis, que sunt in circuitu ejusdem Celle, a quibus nives per declivia montium dilabi in valles noscuntur. & ut hoc concambium Ecclesie Basiliensi utilius fuisset factum quam non factum, ex parte Episcopi juramentum fecerunt Herimannus de *Pischophingen*, Humbertus de *Untchirichen*, Luitoldus & Solvinus de *Tungen*. In actione & confirmatione hujus concambii aderant testes; quorum nomina subscripta sunt. BERTOLFUS DUX, HERIMANNUS COMES, Ebbo & filius ejus Erchenboldus, Arnoldus, Sigeboldus, Ruodolfus, Burchardus, Wernherus, Cuono, item Cuono, Folchardus, Luitfridus, Wolfgangus, Gerunc. anno dominice incarnationis MLXXXVII. jndict. X. Actum in loco, qui dicitur *Rendelinsum*. (a)

(a) Forte Rindelinseim, Rendelina Curtis, in Pago Sornegandiz sita, de qua ALSATIÆ ILLUSTR. Tom. I. pag. 637. Locus hic profecto ad Episcopatum Basil. pertinuit.